

A Ruta do Viño da Ribeira Sacra será incluída nun plano de cooperación co norte de Portugal

La Voz | 4/2/2010

O proxecto de creación da Ruta do Viño da Ribeira Sacra, que xa se puxo en marcha hai tempo e conta cun equipo encargado do seu desenvolvemento, deberá reorientarse en función do plano de cooperación co norte de Portugal que pretende levar a cabo a Axencia Galega de Desenvolvemento Rural (Agader). Este organismo, dependente da Consellería de Medio Rural, contratará a un técnico destinado a coordinar este proxecto na Ribeira Sacra. Outros tres técnicos ocuparanse do mesmo cometido nas denominacións Rías Baixas, O Ribeiro, Valdeorras e Monterrei.

As liñas de actuación deste proxecto transfronteirizo foron presentadas onte nunha reunión que mantiveron o director de Agader, Antonio Crespo Iglesias, e a directora xeral de Innovación e Industrias Agroforestais, Alejandra Álvarez del Mon-Rego, con representantes dos consellos reguladores das mencionadas denominacións. Na iniciativa, que suporá un investimento de 1,4 millóns de euros ata o próximo setembro, cooperarán Agader, Turgalicia, o Concello de Ribadavia e a Comissão de Viticultura da Região dos Vinhos Verdes, que desenvolve a súa a actividade na rexión portuguesa do Minho.

Obxectivos

As finalidades principais deste proxecto, financiado con fondos europeos, consisten en fomentar «un incremento no número de enoturistas» e «a diversificación do medio rural da eurorexión a través dunha oferta turística de calidade vinculada ao viño», segundo informou Medio Rural. Para lograr este obxectivo, está previsto sinalizar e equipar rutas enolóxicas nestas zonas e promocionalas no ámbito internacional.